


## Interessants documents

Vnederdis cumpara il secund tom cun ovras da pader Baseli Berther

Da Hans Huonder / ANR

**Avon dus onns ha il Forum cultural Tujetsch publicau igl emprem tom cun ovras da pader Baseli Berther ed ussa suonda il secund. Quel cuntegn differentas publicaziuns davart il cumin dalla Cadi e la vischnaunca da Muster ch'ei d'interess per la historia. Plinavon lai il tom era reviver la biografia da pader Baseli Berther, scretta da Guglielm Gadola el Tschespet 23 digl onn 1943.**

Pader Baseli Berther (1858-1931) ha scret, rimnau e documentau differents secturs dalla veta dil mintgadi sisum la Surselva. Oriunds da Dieni ha el scret fetg bia dalla Val Tujetsch. Igl emprem tom ch'il Forum cultural Tujetsch ha publicau cuntegn lu era ovras che pertuccan en emprema lingia sia vischnaunca nativa. Aschia descriva el Selva avon 100 onns, il vitget da Camischolas, mo era las baselgias e capluttas da Tujetsch, la truscha sin plaz Cadruvi e suenter viaspras.



### Presentaziun venderdis proxim

Il secund tom che vegn presentaus venderdis proxim, ils 30 d'october 2009 allas 20.00 ella sala Peter Kaiser dalla claustra a Muster seconcentrescha sin schabetgs e tradiziuns oravontut dil cumin dalla Cadi e dalla vischnaunca da Mustdr. L'occurrentza ei publica. Il cudisch ei vegnius illustraus rehamein cun fotografias d'antruras. Era quei cudisch porta il bul digl archivar communal Tarcisi Hendry. El ei staus quel che ha rimnau las ovras da pader Baseli Berther, elavurau e surluvrau quellas aschia ch'ellas han ussa saviu vegnir publicadas en in document cun pressapauc 180 paginas. Aschia ha ei giu mum leger en tut ils documents, pia preparar els digitalmein. Sco quei che Tarcisi Hendry di, ha il lungatg era stuiu vegnir adattaus parzialmein a quel dad oz. L'ediziun dall'ovra cumpeggia 500 exemplars, ils cuosts da produziun persunter importan rodund 14'000.- francs. Da pliras varts ha il forum obteniu contribuziuns finanzialas che han aschia gidau a cuvierer silmeins ina part dils cuosts. Digl emprem tom ch'ei cumparius avon dus onns ei dil reminent vegniu vendiu entochen ussa circa - 150 exemplars. Per puder derasar ils dus toms cun quellas interessantas lavurs da pader Baseli Berther ha il forum lantschau ina acziun da vendita ell'entira Cadi. Ils dus toms san vegnir retratgs per in prezi special

### Da temps passai

Il secund tom ei in cudisch ch'astgass interessar en emprema lingia ils vischins da Mustér, pertgei ina buna part da quel rapporta da fatgs e schabetgs historics locals, dil cumin e da sia tschentada. «Mei persunalmein fascinescha la lavur davart

ils Bannerherrs dalla Cadi il pli fetg», di Tarcisi Hendry sin la damonda, tgei part da quei cudisch ch'interesseschi el il pli fetg. Quella lavur davart ils bandierels dil cumin dalla Cadi ei cumparida igl onn 1920 en stamparia Paradies ad Ingenbohl e descriva l'incumbensa da quels. Il document cuntegn era in capetel da tempra polemica en favur dallas veglias bandieras dalla Cadi. «En quei connex ha pader Baseli Berther stridau bein enqualin. Il meret ei denton staus quei ch'el ha entras sia scrutaziun carmalau neunavon duas dallas quater bandieras veglias dil cumin dalla Cadi», di Tarcisi Hendry. Il secund tom cuntegn la biografia da pader Baseli Berther, scretta da siu anteriur scolar Guglielm Gadola da Muster. Apparentamein ei pader Baseli staus siu promotur partenent igl interess per la cultura indigena. La biografia cumpeggia era ina survesta dalla historia e dil svilup dalla Biblioteca romontscha en claustra da Muster. Pader Baseli ha gronds merets en favur da quella.

### **Dabia da Mustér**

Ina buna part dil cudisch sefatschenta da fatgs locals sin intschess dalla vischnaunca da Mustér. Aschia descriuva pader Baseli Berther la tschentada dil cumin dalla Cadi digl onn 1656. En quei capetel va ei en emprema lingia pil mistial Giachen Berchter che duei haver scarpau alla tschentada dil cumin ina bulla papala che reglavi dretgs dalla claustra e digl uestgiu da Cuera. Pader Baseli sa documentar che quei ei buca stau aschia. Ina outra part dil cudisch sededichescha als zenns dalla baselgia parochiala da S.Gions ed in'ulteriura alla caplutta da S.Catrina. Ordvard interessantas ein era las „Reminiscenzas d'in vegl curant da Muster“. Siu davos studi culturhistoric ha pader Baseli Berther numnadamein dedicau alla historia dils da Mustér, oravontut alla historia dallas pli veglias casas dil vitg, las duas casas cumin sco era ad enzacontas outras casas marcantas. La davosa part dil cudisch documentescha che pader Baseli Berther era medemamein poet. Entginas poesias dattan perdetga persuerter.